

*Eduard Maduro SADA:*

## Nos no lo sinta cu ATIA pasobra nos sa unda nan stand punt ta



**ORANJESTAD** – Despues di a bay den accion siman pasa sindicato di Duana, esta SADA, a reuni hunto cu e miembronan y abogado. Durante e reunion e directiva a trece dilanti diferente punto cu ta importante.

Mas cu claro nan a papia riba e accion unda cu nan a muestra nan mal contento riba e asunto cu siguridad di ASTEC a indica cu nan ta controla e duaneronan. Di otro banda duaneronan a indica cu esey no por, pasobra nan

tambe tin autoridad manera polis. Tur cos a pone cu nan mester a yega te cerca minister pa asina trata e asunto aki. Na e reunion di diamars anochi, sr. Eduard Maduro presidente di SADA a indica di a yega na un acuerdo. E sindicato no lo sinta cu ATIA y nan lo warda riba e plannan pa loke ta trata e manehamento di waf.

Segun sr. Maduro, e miembronan di e sindicato a yega masal pa e reunion y durante esaki cosnan a bay bon. E miembronan kier a haya sa kico tabata e desaroyo di e accion cu a tuma luga siman pasa na waf di Barcadera. “Mi por bisa despues di un reunion, e tabata tin un resultado fructifero pa nos,” el a bisa.

### Meta di reunion

E meta pa cu e reunion di diamars anochi tabata pa directiva di SADA informa e miembronan pa loke ta e situacion di ASTEC. El a sigui indica cu ASTEC kier a implementa algun regla riba e duaneronan, di cual den nan opinion esaki no ta conforme cu nan ehecucionnan di trabou. Despues di a sinta cu nan abogado dialuna y minister Angel Bermudez, e directiva a percura pa duna e miembronan tur informacion cu nan a haya durante e reunion. “Di akianan mi por bisa cu unanimamente nos a yega na un decision di kico lo ta nos siguiente paso,” sr. Maduro a indica.

### No lo sinta cu ATIA

A puntra sr. Maduro si nan lo yega na un forma cerca ATIA

pa asina no mester bay corte. El a indica cu e sindicato no lo bay sinta cu ATIA. Nan ta kere cu despues di diabierna, ya caba nan sa kico ta e stand punt di ATIA. “Despues cu a sinta cu minister y mirando cu sin cu nos a tuma contact mes siman pasa cu minister, mi por bisa cu ya caba nos bos a yega unda e mester yega,” e sindicalista a indica.

Tambe e ta kere, prome cu nan a sinta cu minister cosnan a cuminsa cana den nan favor. “Mi por bisa despues cu a reuni cu e miembronan, nos a dicidi cu no ta necesario pa sigui cu ningun accion. E accionnan no lo bay sigui pasobra tin plannan y tin acuerdonan riba mesa cu minister y mas otro minister pa loke ta e manehamento di waf,” el a bisa. □